

Umngoje Bwana ili Akupe Nguvu

[Yesu] Akawaambia, Njoni ninyi peke yenu kwa faragha, mabali pasipokuwa na watu, mkapumzike kidogo. Kwa sababu walikuwako watu wengi, wakija, wakienda, hata haikuwapo nafasi ya kula—Marko 6:31.

Wale ambao wanajihusisha na kazi ... wanapaswa kukaa karibu sana na Bwana ili kwamba nuru iangaze kutoka kwao kama kutoka kwenye taa iwakayo. Pale kunapooneshwa dhamira ya kina na ya bidii ili kufanya kazi pamoja, umoja huo wa watenda kazi utatangaza ukweli kwa nguvu, ukileta mvuto mkubwa kwa wale ambao si wa imani yetu....

Watendakazi wa Mungu watakabaliana na zahama, adha na kuchoshwa. Wakati fulani, moyo wenye mashaka na kuvurugwa unakaribia kukata tamaa. Wakati kukosa utulivu na wasiwasi kunapokuja, mtenda kazi anapaswa kutulia na kupumzika. Yesu anamwalika, “Njoo ... faraghani ... na upumzike kidogo” (Marko 6:31). “Huwapa nguvu wazimiao, humwongezea nguvu yeye asiye kuwa na uwezo.... Wao wamngojeao Bwana watapata nguvu mpya; watapanda juu kwa mbawa kama tai; watapiga mbio, wala hawatachoka; watakwenda kwa miguu, wala hawatazimia” (Isaya 40:29-31)....

Mtendakazi hawezi kupata mafanikio anapokuwa na haraka katika maombi yake kwa Mungu na kukimbilia kuangalia kitu ambacho anaogopa kinaweza kupuuzwa au kusahaulika. Anatumia muda wake kutoa maombi machache kwa haraka kwa Mungu, hivyo tu. Hajipatii muda wa kufikiri, wa kuomba na kumngoja Bwana kwa ajili ya kufanywa upya katika nguvu za kiroho na kimwili. Anakuwa wa kuchoka kwa urahisi. Wala hahisi mvuto uinuo na utiao moyo wa Roho wa Mungu. Wala hahuishwi kwa uzima mpya. Mwili wake uliodhoofika na ubongo uliochoka hauburudishwi kukutana binafsi na Yesu Kristo.

“Umngoje Bwana: uwe hodari, upige moyo konde, naam, umngoje Bwana” (Zaburi 27:14). “Ni vema mtu autarajie wokovu wa Bwana Na kumngojea kwa utulivu” (Maombolezo 3:26). Kuna wale wanaofanya kazi kutwa nzima na usiku kucha ili kukamilisha kile kinachoonekana kwao kuwa kinahitaji kukamilishwa. Bwana anawatazama kwa huruma wabeba mizigo hawa waliolemewa na waliochoka na kuwaambia, “Njoni kwangu ... Nami nitawapumzisha.... Kwa maana nira yangu ni laini, na mizigo wangu ni mwepesi (Mathayo 11:28–30) (Letter 83, 1902).

Maisha yetu yanapaswa kufichwa pamoja na Yesu ndani ya Mungu; na yakihifadhiwa hivyo, katika mikono Yake yatabadilishwa kuwa nuru ambayo itaangazwa kwa ulimwengu nuru angavu na isiyo zimika.... Lakini ijapokuwa muda ni mfupi na kuna kazi kubwa ya kufanywa, Bwana hafurahishwi kutuona tukifanya kazi hivyo kwa muda mrefu kiasi ambacho tutakosa muda kwa ajili ya kupumzika, wa kusoma Biblia na wa kujumuika pamoja na Mungu. Haya yote ni ya muhimu kwa ajili ya kuimarisha nafsi, kutuweka katika mazingira ambayo tutaweza kupokea hekima toka kwa Mungu ili tuweze kutumia talanta zetu katika kazi ya Bwana kwa kiwango cha juu (Youth's Instructor, Februari 3, 1898).